

每週經課朗誦經文(巴克禮台語漢字)2013/11/03

共同經課 - 1 哈巴谷書一章一節~四節，二章一節~四節

1 先知哈巴谷所得著的默示 2 耶和華啊！我喉叫，你無聽，欲到底時啊？我因為強暴叫苦，你猶無拯救。
3 你啥事互我看見罪惡？橫逆的事，你啥事定定看？毀滅及強暴佇我面前，相爭相拍攏發起。4 因為按呢律法放鬆，無行公平；歹人圍困義人，所以審判無正直。1 我欲倚守更樓，倚佇營寨觀看，看伊對我講甚麼話，我通用甚麼話來訴明。2 耶和華應我講：寫此個默示明明刻佇板裡，互讀的人也通走。3 因為此個默示猶有定著的期，欲緊緊結局，決斷無白賊。雖然延延，猶久著聽候；因為的確會到，無閣延延。4 看啊，伊的心神自高，佇伊的內面無正直；獨獨義人欲對伊的信來活。

共同經課 - 2 詩篇一百一十九篇一百三十七節~一百四十四節

137 耶和華，你是公義的；你的判斷亦是正直的！138 你所命令干證的話是照公義極其誠實。139 我的心熱，親像火燒滅我，因為我的對敵袂記得你的話。140 你的話鍛煉到真精，所以你的奴僕真意愛。141 我卑微，互人看輕，總是我無袂記得你的教示。142 你的公義是永遠的公義；你的律法是真實。143 我抵著患難憂苦，總是你的誠命是我所歡喜的。144 你干證的話永遠是公義；求你互我智慧，我就會活。

共同經課 - 3 帖撒羅尼迦後書一章一節~四節，十一節~十二節

1 保羅、及西拉，以及提摩太批寄互帖撒羅尼迦人的教會，就是惦佇咱的父——上帝及主耶穌基督的。2 願恁對父上帝及主耶穌基督得著恩典、平安。3 兄弟啊，阮應該為著恁常常感謝上帝，這本是合宜的；因為恁的信益發長大，閣恁眾人逐個相疼的心攏充足。4 致到阮佇上帝諸個教會將恁來誇口，因為恁佇一切的窘逐及所受的患難中，有存吞悞及信的心。11 為著按呢，阮也常常替恁祈禱，願咱的上帝看恁做會堪得佇所受的召，閣用權能來圓滿一切所欣慕的好，及對信所做的工；12 互咱的主耶穌的名佇恁得著榮光，恁也佇伊得著榮光，照咱的上帝及主耶穌基督的恩。

共同經課 - 4 路加福音十九章一節~十節

1 耶穌入耶利哥，啲過去的時，2 有一人名叫撒該，是做抽餉的頭人，也是好額。3 伊愛欲看耶穌是甚麼人；若是人多，看袂著，因為伊身軀矮細，4 就走做前，緝上桑材樹，欲看伊，因為耶穌欲對遐過。5 耶穌到彼位，抬頭看伊，講：「撒該，緊緊落來！因為今仔日我的確著惦你的家。」6 就緊緊落來，歡喜接納伊。7 眾人看見，耦耦唸講：「伊入去歇佇歹人的厝。」8 撒該倚啲對主講：「主啊，我將所有的一半互喪鄉人；若是曾彎甚麼人，就將四倍賠伊。」9 耶穌對伊講：「今仔日拯救到佇此個家，為著伊也是亞伯拉罕的子孫。10 因為人子到，是欲尋失落的，來救伊。」